



UDRUŽENJE INOVATIVNIH PROIZVOĐAČA LIJEKOVA U BOSNI I HERCEGOVINI - SKUPŠTINA -

ul. Grbavička br. 4
Sarajevo

Na osnovu članova 10. i 20. Zakona o udruženjima i fondacijama Bosne i Hercegovine („Službeni glasnik BiH“, br. 32/01 i 42/03, 63/08 i 76/11), skupština Udruženja inovativnih proizvođača lijekova u Bosni i Hercegovini, na sjednici održanoj dana **30.03.2023.** godine u Sarajevu, donijela je:

STATUT

Udruženja inovativnih proizvođača lijekova u Bosni i Hercegovini

I OPŠTE ODREDBE

Član 1.

- (1) Udruženje inovativnih proizvođača lijekova u Bosni i Hercegovini (u daljnjem tekstu: „**Udruženje**“) je osnovano Odlukom o osnivanju, broj: 2/13 od 23.12.2013. godine, kao dobrovoljno, samostalno, nestranačko, nevladino i neprofitno udruženje u skladu sa Zakonom o udruženjima i fondacijama Bosne i Hercegovine (u daljnjem tekstu: „**Zakon**“), te je u Registru udruženja i fondacija koje se vodi kod Ministarstva pravde Bosne i Hercegovine upisano pod brojem: RU-1620/14.

Član 2.

- (1) Statutom, u skladu sa članom 12. Zakona, utvrđuje se:
- (a) naziv udruženja;
 - (b) skraćeni naziv i adresa Udruženja;
 - (c) ciljevi i djelatnosti Udruženja;
 - (d) postupak za prijem i isključivanje članova;
 - (e) organi Udruženja, način na koji se biraju, ovlaštenja koja imaju, kvorum i pravila glasanja, trajanje mandata, osobu ovlaštenu da sazove skupštinu, uvijete i način raspuštanja, odnosno prestanak rada;
 - (f) pravila za ostvarivanje, upotrebu i raspolaganje sredstvima Udruženja, kao tijelo koje je ovlašteno za nadzor nad upotrebom tih sredstava;
 - (g) način podnošenja finansijskog izvještaja i izvještaja o radu;
 - (h) javnost rada;
 - (i) postupak za izmjenu i dopunu Statuta, ovlaštenja i način donošenja drugih općih akata;
 - (j) opis oblika i sadržaj pečata Udruženja;
 - (k) znak Udruženja;
 - (l) zastupanje Udruženja;
 - (m) uslovi i postupak za spajanje i podjelu Udruženja, odnosno prestanak rada uključujući i bilo kakav poseban kvorum ili pravila za postizanje kvalificirane većine u postupku glasanja;
 - (n) postupak za raspolaganje preostalim imovinom ili drugim sredstvima u slučaju raspuštanja ili prestanka rada Udruženja; te
 - (o) druga pitanja od značaja za organizovanje rada Udruženja.



Član 3.

- (1) Udruženje okuplja redovne članove iz Bosne i Hercegovine, kao i pridružene članove Udruženja sa sjedištem izvan teritorije Bosne i Hercegovine, a sa namjerom ostvarenja ciljeva i djelatnosti utvrđenih ovim Statutom.
- (2) Udruženje ostvaruje saradnju sa drugim organizacijama u skladu sa svojim i njihovim Statutima.
- (3) Udruženje može biti član i drugih srodnih organizacija, koje su registrovane i djeluju na teritoriji Bosne i Hercegovine.
- (4) Udruženje djeluje na cijelom području Bosne i Hercegovine.

Član 4.

- (1) Udruženje ima status pravnog lica koje je steklo upisom u Registar udruženja kod nadležnog Ministarstva pravde Bosne i Hercegovine (daljnjem tekstu „Ministarstvo“) pod brojem RU-1620/14.

II OSNOVNI PRINCIPI

Član 5.

- (1) Osnovni principi rada Udruženja su:
 - (a) zakonitost;
 - (b) dobrovoljnost;
 - (c) otvorenost;
 - (d) transparentnost.

III NAZIV, SKRAĆENI NAZIV I SJEDIŠTE UDRUŽENJA

Član 6.

- (1) Naziv Udruženja:
 - (a) na bosanskom jeziku glasi: Udruženje inovativnih proizvođača lijekova u Bosni i Hercegovini;
 - (b) na hrvatskom jeziku glasi: Udruga inovativnih proizvođača lijekova u Bosni i Hercegovini;
 - (c) na srpskom jeziku glasi: Удружење иновативних произвођача лијекова у Босни и Херцеговини.
- (2) Skraćeni naziv Udruženja:
 - (a) na bosanskom jeziku glasi: UIPL u BiH;
 - (b) na hrvatskom jeziku glasi: UIPL u BiH;
 - (c) na srpskom jeziku glasi: УИПЛ у БиХ.
- (3) Naziv Udruženja: Udruženje inovativnih proizvođača lijekova u Bosni i Hercegovini na engleskom jeziku je: Association of Research-Based Medicine Producers in Bosnia and Herzegovina.



Član 7.

- (1) Sjedište Udruženja je u Sarajevu, na adresi: ul. Grbavička br. 4.

IV OPIS OBLIKA I SADRŽAJA PEČATA UDRUŽENJA

Član 8.

- (1) Udruženje ima pečat okruglog oblika, promjera 50 mm. U sredini pečata je skraćeni naziv Udruženja: „UIPL u BiH“, a na unutrašnjoj strani ruba pečata stoji puni naziv Udruženja na sva tri službena jezika u Bosni i Hercegovini:
 - na bosanskom jeziku: Udruženje inovativnih proizvođača lijekova u Bosni i Hercegovini;
 - na hrvatskom jeziku: Udruga inovativnih proizvođača lijekova u Bosni i Hercegovini;
 - na srpskom jeziku: Удружење иновативних произвођача лијекова у Босни и Херцеговини.i sjedište: Sarajevo.

V ZNAK UDRUŽENJA

Član 9.

- (1) Udruženje ima znak kružnog oblika.
- (2) U vanjskom rubu kružnog dijela znaka se sastoji od osam grafički stiliziranih ljudskih silueta poredanih tako da formiraju kružnicu, koje prikazuju ljudski torzo, glavu i uzdignutu lijevu ruku koji simboliziraju zajedništvo, u centru kružnog dijela znaka Udruženja se nalazi stiliziran prikaz DNA spirale, kao simbol inovacije u farmaceutskoj industriji.
- (3) Znak Udruženja se u skladu sa Zakonom i podzakonskim propisima registrira kod Ministarstva.

VI CILJEVI I DJELATNOSTI UDRUŽENJA

Član 10.

- (1) Ciljevi i djelatnosti udruženja su:
 - (a) rad na predlaganju nadležnim tijelima izmjena i dopuna propisa koji mogu uticati na proizvodnju, kontrolu kvalitete, skladištenje, propisivanje, izdavanje i priznavanje troškova za lijekove koje proizvode članice Udruženja, u skladu sa Zakonom;
 - (b) kontinuirano i pravovremeno osiguravanje važnih informacija članovima Udruženja, te zastupanje njihovih interesa;
 - (c) zalaganje za obrazovanje i edukaciju kadrova u vezi sa farmaceutskom regulativom na snazi u Bosni i Hercegovini;
 - (d) pomoć i podrška u stvaranju uslova za poboljšanje konkurentnosti članova Udruženja u Bosni i Hercegovini;
 - (e) zalaganje za poticanje svih relevantnih učesnika na tržištu Bosne i Hercegovine radi kreiranja povoljnog ekonomskog, administrativnog i političkog okruženja, u cilju



omogućavanja inovativnoj farmaceutskoj industriji da zadovolji rastuće potrebe zdravstvene zaštite stanovništva, a prije svega potreba oboljelih lica, u skladu sa Zakonom;

- (f) rad na promoviranju i unapređenju primjene načela dobre proizvođačke laboratorijske prakse u cilju dostizanja kvalitete lijekova u Bosni i Hercegovini u skladu sa standardima koji se primjenjuju u državama članicama Evropske Unije;
 - (g) rad na promoviranju i unapređenju primjene načela dobre kliničke prakse radi stvaranja preduvjeta za zaštitu interesa oboljelih lica i etičku provedbu kliničkih ispitivanja u Bosni i Hercegovini;
 - (h) pomoć i podrška u održavanju inovacijama, zaštiti intelektualnog vlasništva, dostupnost informacija i tržišnog natjecanja u vezi sa lijekovima, u skladu sa Zakonom;
 - (i) ukazivanje na neetične postupke farmaceutskih proizvođača koji nisu članovi Udruženja, kao i drugih učesnika na tržištu lijekova;
 - (j) ukazivanje na nestandardne, nekvalitetne i neadekvatne lijekove nadležnim organima;
 - (k) rad na iniciranju izmjena i dopuna zakona i drugih propisa koji uređuju dostupnost lijekova na tržištu Bosne i Hercegovine;
 - (l) rad na pokretanju inicijativa organima vlasti za usklađivanje važećih propisa sa standardima i smjernicama prihvaćenim od strane država članica Evropske Unije, kojima se regulira izdavanje dozvola za stavljanje u promet lijekova, distribucija lijekova, propisivanje lijekova, izdavanje lijekova, kontrola kvalitete i priznavanje troškova za lijekove od strane nadležnog organa i ustanova;
 - (m) saradnja sa istim i sličnim udruženjima, asocijacijama, pravnim licima i institucijama vlasti u zemlji i inostranstvu, u svrhu ostvarivanja djelatnosti Udruženja, u skladu sa Zakonom;
 - (n) razmjena iskustava sa istim ili sličnim udruženjima u zemlji i inostranstvu, u svrhu ostvarivanja djelatnosti Udruženja, u skladu sa Zakonom; i
 - (o) izdavanje knjiga, brošura, biltena, letaka, afiša i drugih publikacija, u svrhu ostvarivanja djelatnosti Udruženja, u skladu sa Zakonom.
- (2) Udruženje može obavljati privredne djelatnosti samo ako je osnovna svrha takvih djelatnosti ostvarivanje ciljeva Udruženja utvrđenih Statutom.
- (3) Udruženje može obavljati nesrodne privredne djelatnosti (privredne djelatnosti koje nisu neposredno povezane sa ostvarivanjem osnovnih statutarnih ciljeva Udruženja) samo preko posebno osnovane pravne osobe.

VII POSTUPAK PRIMANJA I ISKLJUČIVANJA ČLANOVA UDRUŽENJA, VRSTE ČLANOVA UDRUŽENJA, PRAVA, DUŽNOSTI I ODGOVORNOSTI ČLANOVA UDRUŽENJA

Član 11.

- (1) Članstvo u Udruženju je dobrovoljno.
- (2) Udruženje ima redovne i pridružene članove.
- (3) Osnivači su stekli svojstvo redovnog člana Udruženja danom registracije Udruženja kod Ministarstva.
- (4) Redovni član Udruženja može biti:
 - (a) pravno lice registrirano za proizvodnju lijekova u Bosni i Hercegovini, koja imaju dozvolu za stavljanje u promet lijekova u Bosni i Hercegovini za najmanje jedan inovativni lijek; i



- (b) pravno lice registrirano u Bosni i Hercegovini čiji osnivač ili povezano lice je inostrano pravno lice koje je proizvođač ili ima dozvolu za stavljanje u promet lijekova u Bosni i Hercegovini za najmanje jedan inovativni lijek.
- (5) Inovativnim lijekom se smatra lijek za ljudsku upotrebu koji je kod Agencije za lijekove i medicinska sredstva dobio dozvolu za stavljanje u promet na osnovu vlastite dokumentacije iz člana 33. Zakona o lijekovima i medicinskim sredstvima, tj. Lijek sa novom aktivnom supstancom za koji je proizvođač na temelju vlastitih eksperimentalnih podataka, koji uključuju pretklinička i klinička ispitivanja, izradio potpunu dokumentaciju s dokazima o učinkovitosti, kvaliteti i sigurnosti i na osnovu koje je u Bosni i Hercegovini izdana dozvola za stavljanje u promet tog lijeka.
- (6) Pravna lica registrovana u Bosni i Hercegovini koja ispunjavaju uslove za redovno članstvo u Udruženju, u skladu sa stavovima 3. i 4. ovog člana Statuta, pristupaju Udruženju donošenjem odluke o pristupanju od svog nadležnog organa, prihvatanjem ciljeva, djelatnosti i Statuta Udruženja, te učestvuju u radu Udruženja putem svojih predstavnika-delegata u Skupštini Udruženja.
- (7) Prilikom pristupanja u Udruženje, redovni članovi uz odluku o pristupanju iz prethodnog stava, dostavljaju Udruženju dokumentaciju kojom dokazuju ispunjavanje uslova za redovno članstvo u Udruženju u skladu sa stavovima (3) i (4) ovog člana Statuta.
- (8) *Pridruženi član Udruženja može biti pravno lice koje je kod Agencije za lijekove i medicinska sredstva shodno važećem rješenju kojim se daje dozvola za stavljanje lijeka u promet registrirano u Bosni i Hercegovini kao proizvođač inovativnog lijeka, ili drugo pravno lice koje je sa proizvođačem povezano pravno lice u smislu Zakona o privrednim društvima, bez obzira da li ima registrirano sjedište u Bosni i Hercegovini ili inostranstvu.*
- (9) *Pridruženi član nema pravo glasa na skupštini Udruženja, ali može učestvovati u raspravljanju na Skupštini.*
- (10) *Predstavnici pridruženog člana ne mogu biti imenovani u Upravni odbor Udruženja.*
- (11) *Pridruženi član Udruženja može imenovati članove za rad u radnim grupama Udruženja, **izuzev u radnoj grupi za pristup tržištu.***
- (12) *Pridruženi član plaća članarinu Udruženju u iznosu koji je manji od članarine koju plaćaju redovni članovi Udruženja.*
- (13) *Pridruženi članovi stupaju u članstvo donošenjem odluke o pristupanju svog nadležnog organa, prihvatanjem ciljeva, te učestvuju u radu Udruženja uz ograničenja utvrđena ovim Statutom.*
- (14) *Prilikom pristupanja u Udruženje, pridruženi članovi uz odluku o pristupanju iz prethodnog stava, dostavljaju Udruženju dokumentaciju kojom dokazuju ispunjenje uslova za pridruženo članstvo iz stava (7) ovog člana Statuta.*
- (15) Udruženje može odbiti članstvo u Udruženju licima koja Udruženju ne dostave odgovarajuću dokumentaciju o ispunjavanju uslova za članstvo u Udruženju. Udruženje pravilnikom o članstvu u Udruženju detaljnije regulirati uslove za upisivanje pravnih lica u redovne i pridružene članove Udruženja.

Član 12.



- (1) Udruženje vodi spisak članova Udruženja u elektronskom obliku, u koji se u skladu sa Zakonom upisuju sljedeći podaci o članovima:
 - (a) firma (naziv) člana,
 - (b) adresa sjedišta,
 - (c) vrsta članstva u Udruženju, redovno ili pridruženo;
 - (d) datum pristupanja Udruženju i broj pristupnice.
 - (e) datum prestanka članstva.
- (2) Direktor Udruženja je odgovoran za vođenje spiska članova.
- (3) U slučaju promjena u podacima iz stava (1) ovog člana, član Udruženja je obavezan u roku od 7 dana od dana promjene obavijestiti Udruženje o nastalim promjenama uz dostavljanje odgovarajuće dokumentacije.

Član 13.

- (1) Članstvo u Udruženju prestaje:
 - (a) dobrovoljnim istupanjem iz Udruženja;
 - (b) isključenjem iz Udruženja zbog narušavanja ugleda Udruženja ili nepridržavanja odredaba Statuta;
 - (c) u slučaju prestanka ispunjavanja uslova za članstvo u Udruženju određenih članom 11. ovog Statuta;
 - (d) neplaćanjem članarine duže od 1 godine;
 - (e) prestankom svojstva pravnog lica;
 - (f) prestankom rada Udruženja; i
 - (g) u drugim slučajevima utvrđenim Statutom.

Član 14.

- (1) Svaki član Udruženja može dobrovoljno istupiti iz Udruženja na osnovu pismene izjave o istupanju koju dostavlja Upravnom odboru Udruženja.
- (2) Kao dan prestanka članstva u Udruženju smatra se datum prijema izjave o istupanju.
- (3) Član Udruženja koji grubo krši Statut, ne izvršava svoje obaveze prema Udruženju ili svojim postupcima nanosi štetu Udruženju ili narušava ugled Udruženja može biti isključen prije donošenja odluke o isključenju. Član Udruženja mora biti pismeno obavješten o prijedlogu za isključenje, kao i razlozima zbog kojih se predlaže isključenje.



- (4) Odluku o prestanku svojstva člana Udruženja donosi Upravni odbor.
- (5) Član koji je nezadovoljan odlukom iz prethodnog stava, može podnijeti žalbu Skupštini u roku od 15 dana od dana prijema odluke o isključenju.
- (6) Odluka Skupštine po žalbi je konačna.

Član 15.

- (1) Prava i dužnosti redovnih i pridruženih članova Udruženja su:
 - (a) da daju prijedloge, mišljenja i sugestije;
 - (b) da prate rad Udruženja i pokreću inicijativu za rješavanje pitanja od interesa za Udruženja;
 - (c) da budu redovno informirani o radu i rezultatima rada Udruženja;
 - (d) da u zaštiti svojih prava koriste pomoć Udruženja;
 - (e) da se pridržavaju Statuta i drugih akata organa Udruženja;
 - (f) da aktivno učestvuju u ostvarivanju programskih ciljeva i zadataka Udruženja;
 - (g) da čuvaju ugled Udruženja i drugih članova Udruženja;
 - (h) da učestvuju u aktivnostima Udruženja;
 - (i) da savjesno i odgovorno izvršavaju povjerene poslovne zadatke u vezi sa radom i aktivnostima; i
 - (j) da uredno i na vrijeme izmiruju članarinu.
- (2) Redovni i pridruženi članovi Udruženja su ravnopravni u ostvarivanju svojih prava i dužnosti, izuzev ako je ovim Statutom drugačije određeno.
- (3) Redovni članovi Udruženja imaju pravo da biraju i budu birani u sve organe Udruženja izuzev na funkcije direktora Udruženja i predsjednika Etičkog vijeća Udruženja.
- (4) Pridruženi članovi imaju pravo da biraju i budu birani u radne grupe Udruženja u skladu sa odredbom stavom 8. člana 10. Statuta, Etičkog vijeća Udruženja, te da u njihovom radu glasaju.
- (5) Predstavnici pridruženih članova ne mogu biti birani za Predsjednika skupštine, Potpredsjednika skupštine, članove Upravnog odbora i predsjednika Etičkog vijeća.
- (6) Pridruženi članovi imaju pravo da učestvuju u radu skupštine Udruženja, što uključuje davanje prijedloga za izmjene i dopune dnevnog reda, ali bez prava glasa.
- (7) Svaki član Udruženja, redovni ili pridruženi, može pokrenuti postupak pred nadležnim sudom za utvrđivanje ništavnosti općeg akta Udruženja, koji je donesen suprotno odredbama Statuta ili drugog općeg akta Udruženja, a najkasnije u roku od šest mjeseci od dana donošenja tog akta.

Član 16.

- (1) Redovni i pridruženi članovi Udruženja i njihovi predstavnici u organima Udruženja se moraju uzdržavati od iznošenja bilo kojih navoda o načinu svog ili poslovanja drugih članova Udruženja, te se odnositi sa punim poštovanjem i uvažavanjem prema drugim članovima Udruženja i licima imenovanim u organe Udruženja.



- (2) Iznošenje neargumentiranih, neprovjerenih ili netačnih navoda o kršenju ovog Statuta ili drugih općih akata Udruženja od strane drugih Članova Udruženja na sjednicama Skupštine, Upravnog odbora ili drugih organa Udruženja, predstavlja povredu ovog Statuta.
- (3) Članovi Udruženja na organima i radnim tijelima Udruženja mogu:
 - (a) iznositi činjenice i navode na okolnost ograničavanja dostupnosti inovativnih lijekova, nedostacima u zdravstvenom sistemu i slično, koji su uzrokovani ili mogu biti uzrokovani:
 - djelovanjem, ili propuštanjem djelovanja, institucija države Bosne i Hercegovine, entiteta, Brčko Distrikta Bone i Hercegovine i kantona,
 - nedostacima u važećim zakonskim i podzakonskim propisima ili njihovom pogrešnom primjenom, te nacrtima i/ili prijedlozima zakona i podzakonskih akata u oblasti lijekova;
 - (b) davati prijedloge i inicijative za unaprjeđenje rada Udruženja na ispunjenju njegovih ciljeva i zadataka, uključujući i inicijative za saradnju Udruženja sa trećim licima kao što su institucije i drugi organi javne vlasti na svim nivoima, međunarodne institucije, zdravstvene ustanove, razvojne agencije, udruženja proizvođača lijekova, pacijenata, članova porodica pacijenata, zdravstvenih radnika, i slično.
- (4) U vezi sa povredom Statuta iz stava 2. ovog člana Statuta se može izreći sankcija:
 - (a) Javna opomena,
 - (b) Oduzimanje riječi, u slučaju ponavljana kršenja na istoj sjednici;
- (5) Sankciju iz stava (4) izriče lice koje predsjedava sjednicom organa Udruženja, skupštine, upravnog odbora i radnih grupa, na kojoj je učinjeno takvo kršenje, te se ista obavezno unosi u zapisnik.
- (6) Direktor Udruženja je obavezan dostaviti zapisnik sa sjednice na kojoj je izrečena Sankcija iz stava (4) ovog člana:
 - (a) Predsjedniku Skupštine Udruženja i Potpredsjedniku skupštine Udruženja, ukoliko je sankcija izrečena na sjednici Upravnog odbora, kao i zakonskom zastupniku Člana Udruženja ispred kojeg je imenovano lice kojem je izrečena sankcija;
 - (b) Predsjedniku Upravnog odbora Udruženja i zakonskom zastupniku Člana Udruženja čijem predstavniku je izrečena sankcija na sjednici radne grupe.

VIII ORGANI UDRUŽENJA, NAČIN NA KOJI SE BIRAJU, OVLAŠTENJA KOJA IMAJU, KVORUM I PRAVILA GLASANJA, TRAJANJE MANDATA

Član 17.



Organi Udruženja su:

1. Skupština;
2. Upravni odbor;
3. Direktor.

Član 18.

(1) Pored organa iz člana 17. ovog Statuta u Udruženju mogu biti organizirani:

- radne grupe čije članove predlažu Članovi Udruženja; i
- Etičko vijeće.

1. Skupština

Član 19.

- (2) Skupština je najviši organ Udruženja i čine je svi članovi Udruženja, s tim da pridruženi članovi nemaju pravo glasa ali imaju pravo učestvovanja u raspravama.
- (3) Radom Skupštine rukovodi Predsjednik skupštine kojeg bira i razrješava Skupština, a u slučaju njegovog odsustva, radom Skupštine rukovodi Potpredsjednik skupštine kojeg također bira i razrješava Skupština.
- (4) Mandat predsjednika i potpredsjednika Skupštine traje 2 (dvije) godine s pravom ponovnog izbora.
- (5) Skupština zasjeda prema potrebi, a najmanje jednom godišnje.
- (6) Skupštinu saziva predsjednik Skupštine, najkasnije 15 dana prije njenog zasjedanja i istom predsjedava.
- (7) Predsjednik Skupštine je dužan sazvati Skupštinu u slučaju kada to zahtijeva najmanje jedna trećina članova Udruženja ili na zahtjev Upravnog odbora.
- (8) Ako predsjednik Skupštine ne sazove Skupštinu u roku od 30 dana u slučajevima iz prethodnog stava, odluku o sazivanju Skupštine donijet će Upravni odbor.
- (9) Glasanje na zasjedanju je javno, izuzev ukoliko Skupština na samoj sjednici ne utvrdi potrebu za tajnim glasanjem.
- (10) Poziv za učestvovanje na Skupštini se dostavlja svim članovima Udruženja i to putem e-maila na adrese zakonskih zastupnika članova Udruženja.
- (11) Kvorum za održavanje Skupštine je natpolovična većina svih redovnih članova Udruženja. U slučaju da nema kvoruma za održavanje Skupštine, Predsjednik skupštine će ponovo zakazati Skupštinu u roku od 15 dana. Kvorum za održavanje ponovljene Skupštine je jedna trećina svih redovnih članova Udruženja.
- (12) Kvorum se utvrđuje na osnovu spiska članova Udruženja iz člana 12. ovog Statuta.



- (13) Skupština donosi odluke natpolovičnom većinom svih prisutnih članova Skupštine koji glasaju.
- (14) Na sjednici Skupštine vodi se zapisnik, u koji se unose osnovni podaci o radu Skupštine, a naročito donesene odluke, zaključci i podaci o glasanju.

Član 20.

- (1) Sjednice Skupštine se u pravilu održavaju u prostorijama sjedišta Udruženja, ali odlukom o sazivanju skupštine može biti odlučeno da će se sjednica Skupštine održati na daljinu korištenjem tehnologije za održavanje virtualnih sastanaka kao što su Skype, Zoom, Webex i slično, a koja omogućava učestvovanje svih članova Udruženja kao i drugih lica koja su pozvana ili dužna da prisustvuju sjednici Skupštine.
- (2) Na sjednicama Skupštine koje se održavaju na daljinu glasanje o odlukama ne može biti tajno.

Član 21.

- (1) Skupština Udruženja može biti: redovna i vanredna.
- (2) Redovna skupština se sastaje po potrebi, a najmanje jednom u toku kalendarske godine i ima za cilj kontrolu rada putem razmatranja godišnjeg izvještaja o radu Udruženja;
- (3) Vanredna skupština saziva se izuzetno, u slučaju nepredviđenih teškoća u radu, poremećaja ljudskih odnosa u organizaciji ili drugih okolnosti kada je ugrožen rad i vitalni interesi Udruženja.
- (4) Način rada Skupštine pobliže se utvrđuje Poslovníkom o radu Skupštine.

Član 22.

- (1) Članove Udruženja na Skupštini Udruženja predstavljaju njihovi zakonski zastupnici ili lica koja Članovi Udruženja ovlaste pismenom punomoći za zastupanje na skupštini Udruženja.

Član 23.

- (1) Predsjednik i potpredsjednik Skupštine obavljaju sljedeće aktivnosti:
 - (a) staraju se o organiziranju Skupštine i sazivaju njene sjednice;
 - (b) uz prethodne konsultacije sa Upravnim odborom ili jednom trećinom članova Udruženja koji zahtijevaju sazivanje Skupštine, predlažu dnevni red sjednice;
 - (c) predsjedava sjednicama Skupštine;
 - (d) potpisuje akte donesene na Skupštini;
 - (e) stara se o izvršenju odluka, zaključaka i drugih akata skupštine;
 - (f) koordinira rad organa Skupštine, te
 - (g) vrši i druge poslove koje mu odredi Skupština u skladu sa Zakonom i ovim Statutom.
- (2) U slučaju odsutnosti ili spriječenosti, predsjednika Skupštine mijenja potpredsjednik u svim poslovima iz prethodnog stava ovog člana.



Član 24.

- (1) Skupština Udruženja:
 - (a) usvaja dnevni red Skupštine;
 - (b) donosi Statut, izmjene i dopune Statuta i druga opća akta Udruženja određena Statutom;
 - (c) donosi pravilnike, poslovnike i druge opće akte kojima se uređuju odnosi između Udruženja i članova Udruženja, kao i njihove izmjene i dopune;
 - (d) donosi kodekse ponašanja kojima se uređuju pravila postupanja Udruženja i/ili članova Udruženja prema trećim licima i/ili članova Udruženja i trećim licima, kao i njihove izmjene i dopune;
 - (e) odlučuje o spajanju, podjeli i prestanku rada, osnivanju drugih pravnih lica, kao i o drugim statusnim promjenama Udruženja;
 - (f) usvaja godišnji program i plan rada Udruženja;
 - (g) donosi finansijski plan i usvaja izvještaj o izvršenju finansijskog plana Udruženja;
 - (h) razmatra i usvaja izvještaje koje je pripremio Upravni odbor Udruženja;
 - (i) odlučuje o visini i načinu plaćanja članarine;
 - (j) imenuje i razrješava članove Upravnog odbora Udruženja;
 - (k) imenuje i razrješava predsjednika i potpredsjednika Skupštine Udruženja;
 - (l) rješava po žalbama članova u drugom stepenu;
 - (m) donosi odluku o promjeni naziva i sjedišta Udruženja;
 - (n) odlučuje o svim drugim pitanjima koja nisu u nadležnosti drugih organa Udruženja;
 - (o) nadzire rad Udruženja, uključujući ali se ne ograničavajući se na rad Upravnog odbora i direktora Udruženja, i nadzire upotrebu imovine Udruženja.
- (2) Ako utvrde nepravilnosti u provođenju Statuta, član Udruženja, direktor ili član Upravnog odbora dužni su na to upozoriti Skupštinu Udruženja, odnosno predsjednika Skupštine. Ako se upozorenje ne razmotri na sjednici Skupštine u roku od 30 dana od dana dostavljenog pismenog upozorenja i nepravilnosti ne otklone, može se podnijeti tužba nadležnom sudu u skladu sa Zakonom.
- (3) Odlukom o visini i načinu plaćanja članarine se određuje visina članarine za redovne i pridružene članove Udruženja, a kojom visina članarine za pridružene članove ne može biti jednaka ili veća od članarine za redovne članove, niti manja od 50% iznosa članarine za redovne članove.

2. Upravni odbor

Član 25.

- (1) Upravni odbor je izvršni organ Udruženja.
- (2) Upravni odbor ima pet članova: Predsjednik i četiri člana.
- (3) Članove Upravnog odbora bira i razrješava Skupština Udruženja.
- (4) Mandat članova Upravnog odbora traje 2 (dvije) godine sa mogućnošću reizbora. Mogućnost reizbora je ograničena na najviše dva uzastopna mandata.
- (5) Upravni odbor se sastaje najmanje četiri puta godišnje.



- (6) Dnevni red predlaže predsjednik Upravnog odbora.
- (7) Kvorum za održavanje sjednice Upravnog odbora je natpolovična većina svih članova odbora.
- (8) Upravni odbor donosi odluke natpolovičnom većinom prisutnih članova Upravnog odbora.
- (9) Predsjednik Upravnog odbora saziva sjednice Upravnog odbora i istim predsjedava.
- (10) Pored članova Upravnog odbora, sjednicama obavezno prisustvuje direktor Udruženja, ali bez prava odlučivanja.
- (11) Sjednicama Upravnog odbora mogu prisustvovati druge osobe koje su vezane za realizaciju određenih zadataka, ali bez prava odlučivanja.

Član 26.

- (1) Za člana Upravnog odbora može biti izabrano isključivo lice koje je u vrijeme njegovog imenovanja u radnom odnosu kod nekog od redovnih Članova Udruženja.

Član 27.

- (1) Upravni odbor Udruženja:
 - (a) bira predsjednika Upravnog odbora udruženja između članova Upravnog odbora koje je imenovala Skupština;
 - (b) predlaže program i plan rada Udruženja koji usvaja Skupština;
 - (c) priprema i predlaže nacrt Statuta, njegove izmjene i dopune;
 - (d) priprema i predlaže Skupštini usvajanje pravilnika, poslovnika i drugih općih akata kojima se uređuju odnosi između Udruženja i članova Udruženja, kao i njihove izmjene i dopune;
 - (e) imenuje i razrješava Direktora i odgovoran je za nadzor nad obavljanjem poslova iz nadležnosti Direktora;
 - (f) imenuje i razrješava lica ovlaštena za zastupanje Udruženja;
 - (g) provodi utvrđenu politiku, zaključke i druge odluke koje je donijela Skupština;
 - (h) upravlja imovinom Udruženja, i daje saglasnost direktoru za raspolaganje imovinom u skladu sa finansijskim planom odobrenim od strane skupštine;
 - (i) daje saglasnost direktoru za zaključenje pravnih poslova Udruženja sa trećim licima i poduzimanje pravnih radnji u ime i za račun Udruženja;
 - (j) utvrđuje i predlaže finansijski plan za ostvarivanje, korištenje raspolaganje sredstvima Udruženja, koji donosi Skupština;
 - (k) daje prijedloge, mišljenja i inicijative za ostvarivanje ciljeva Udruženja;
 - (l) podnosi godišnji i periodični izvještaj o svom radu Skupštini na razmatranje i usvajanje;
 - (m) obrazuje komisije, odbore i stručne timove radi realizacije postavljenih ciljeva Udruženja;
 - (n) utvrđuje godišnji i polugodišnji obračun o izvršenju plana prihoda i rashoda Udruženja;
 - (o) poduzima mjere i aktivnosti na ostvarivanju programa rada Udruženja;
 - (p) priprema analize, informacije i druge materijale za Skupštinu;
 - (q) provodi finansijski plana rada Udruženja i donosi odluke o upotrebi sredstava;



- (r) rješava po žalbama članova Udruženja u prvom stepenu;
- (s) donosi pravilnike o radu Upravnog odbora, radnih grupa i drugih tijela Udruženja;
- (t) obavlja i druge poslove u skladu sa Zakonom i ovim Statutom ili ukoliko mu to odredi Skupština;
- (u) imenuje i razrješava lica ovlaštena za zastupanje Udruženja.

Član 28.

- (1) Upravni odbor i svaki njegov član pojedinačno su odgovorni za svoj rad Skupštini.

Član 29.

- (1) Članovi Upravnog odbora mogu biti razriješeni i prije isteka vremena na koje su izabrani i to:
 - (a) na sopstveni zahtjev
 - (b) ako ne dođu na sjednicu Upravnog odbora tri puta uzastopno, bez opravdanih razloga;
 - (c) ako svojim radnjama u vezi sa radom Upravnog odbora ruše ugled Udruženja;
 - (d) *u slučaju prestanka radnog odnosa člana Upravnog odbora kod člana Udruženja, a bez zasnivanja novog radnog odnosa kod drugog redovnog člana Udruženja;*
 - (e) u drugim slučajevima predviđenim Zakonom, ovim Statutom i aktima Udruženja.
- (2) O razrješanju članova Upravnog odbora odlučuje Skupština natpolovičnom većinom glasova svih prisutnih članova Skupštine koji glasaju.
- (3) *Članovi Upravnog odbora su dužni bez odlaganja obavijestiti Udruženje o prestanku njihovog radnog odnosa kod Člana Udruženja.*

Član 30.

- (1) Predsjednik Upravnog odbora:
 - (a) saziva sjednice Upravnog odbora samoinicijativno ili na zahtjev najmanje dvije trećine članova Upravnog odbora;
 - (b) stara se o provođenju programa rada, odluka, zaključaka i smjernica Skupštine;
 - (c) stara se o provođenju planova rada Upravnog odbora;
 - (d) izdaje naloge za izvršenje plana prihoda i rashoda Udruženja;
 - (e) potpisuje akte koje donosi Upravni odbor;
 - (f) vrši i druge poslove za koje je ovlašten ovim Statutom ili koje im povjeri Skupština.

3. Direktor

Član 31.

- (1) Udruženje ima Direktora, kojeg bira i razrješava Upravni odbor Udruženja.
- (2) Mandat Direktora traje 2 (dvije) godine sa mogućnošću reizbora.
- (3) Direktor Udruženja ne može biti zaposlenik bilo kojeg člana Udruženja, niti biti angažovan po ugovoru o djelu ili drugom odnosu sa bilo kojim od članova Udruženja.“



Član 32.

- (1) Direktor Udruženja zasniva sa Udruženjem radni odnos na puno radno vrijeme, a što se regulira Ugovorom o radu koji u ime i za račun Udruženja zaključuje predsjednik Upravnog odbora, na osnovu prethodne pismene saglasnosti Upravnog odbora Udruženja.

Član 33.

- (1) Direktor:
 - (a) zastupa Udruženje u pravnom prometu;
 - (b) provodi odluke Upravnog odbora i Skupštine;
 - (c) priprema i predlaže Upravnom odboru usvajanje nacrtu pravilnika, poslovnika i drugih općih akata kojima se uređuje rad Udruženja i osnivaju stručna tijela i komisije Udruženja;
 - (d) koordinira rad Udruženja;
 - (e) informiše Upravni odbor o svim bitnim pitanjima vezanim za ostvarivanje ciljeva Udruženja i njegovo funkcionisanje;
 - (f) izvršava finansijski plan za ostvarivanje, korištenje i raspolaganje sredstava Udruženje, koji donosi Skupština;
 - (g) daje prijedloge, mišljenja i inicijative za ostvarivanje ciljeva Udruženja;
 - (h) podnosi godišnji i periodični izvještaj o svom radu Upravnom odboru na razmatranje, usvajanje;
 - (i) predlaže Upravnom odboru formiranje radnih grupa, komisija, odbora stručnih timova i slično, radi realizacije postavljenih ciljeva Udruženja;
 - (j) izvršava mjere i aktivnosti na ostvarivanju programa i plana rada Udruženja;
 - (k) priprema analize, informacije i druge mjere za Upravni odbor;
 - (l) obavlja i druge poslove u skladu sa Zakonom i ovim Statutom ili koje mu povjere Skupština i/ili Upravni odbor.

Član 34.

- (1) Direktor je za svoj rad odgovoran Upravnom odboru.

Član 35.

- (1) Direktor može biti razriješen i prije isteka vremena na koje je izabran i to:
 - (a) na sopstveni zahtjev;
 - (b) ako ne prisustvuje sjednicama Upravnog odbora dva puta uzastopno, bez opravdanih razloga;
 - (c) ako u svojim radnjama u vezi sa radom Udruženja ruši ugled Udruženja;
 - (d) u slučaju da ne izvršava mjere i aktivnosti na ostvarivanju programa rada Udruženja shodno odlukama i smjernicama Upravnog odbora i/ili Skupštine;
 - (e) u drugim slučajevima predviđenim Zakonom, ovim Statutom i aktima Udruženja.
- (2) O opozivu Direktora odlučuje Upravni odbor natpolovičnom većinom glasova svih prisutnih članova Upravnog odbora.
- (3) O opozivu Direktora Upravni odbor se obavezno izjašnjava na prijedlog:
 - (a) jedne trećine svih članova Udruženja;
 - (b) jednog člana Upravnog odbora;



(c) Direktora.

4. Radne grupe

Član 36.

- (1) Upravni odbor Udruženja svojom odlukom može osnovati jednu ili više radnih grupa Udruženja (u daljem tekstu: "**Radna grupa**").
- (2) Odlukom o osnivanju Radne grupe iz prethodnog stava, Upravni odbor utvrđuje:
 - (a) nadležnosti i oblasti koje su predmet rada Radne grupe,
 - (b) rok za imenovanje članova Radnih grupa;
 - (c) sazivanje konstituirajućeg sastanka Radne grupe.

Član 37.

- (1) Svaki član Udruženja ima pravo da imenuje jednog predstavnika u Radnu grupu iz reda vlastitih zaposlenika ili zaposlenika s njim povezanih pravnih lica u smislu odredbi Zakona o privrednim društvima.
- (2) Članovi Udruženja mogu da imenuju i zamjenike svojih predstavnika u Radnoj grupi.
- (3) Izuzetno od odredbe stava 1. ovog člana, član Udruženja u radnu grupu može imenovati lice koje nije u radnom odnosu kod tog člana Udruženja ili s njim poveznim pravnim licem, ali na osnovu prethodne pismene saglasnosti Upravnog odbora.

Član 38.

- (4) Pravilnikom koji donosi Upravni odbor se detaljnije uređuje način osnivanja Radnih grupa, imenovanja njihovih članova, sazivanja sastanaka Radnih grupa, rada i odlučivanja na sastancima Radnih grupa.

IX PRAVILA ZA OSTVARIVANJE, UPOTREBU I RASPOLAGANJE SREDSTVIMA UDRUŽENJA, KAO I TIJELO KOJE JE OVLAŠTENO ZA NADZOR NAD UPOTREBOM TIH SREDSTAVA

Član 39.

- (1) Prihodi Udruženja su sljedeći:
 - (a) članarina;



- (b) dobrovoljni prilozi i pokloni fizičkih i pravnih lica, kako inozemnih tako i domaćih, u gotovini, uslugama ili imovini bilo koje vrste;
- (c) državne subvencije i ugovori sa fizičkim i pravnim licima, kako domaćim tako i inozemnim;
- (d) prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- (e) prihodi stečeni kroz ostvarivanje ciljeva i aktivnosti Udruženja u skladu sa Zakonom i ovim Statutom;
- (f) sredstva dobivena iz općinskih, kantonalnih, federalnih i državnih izvora;
- (g) drugi izvori u skladu sa Zakonom.

Član 40.

- (1) Udruženje vodi poslovne knjige i podnosi finansijske izvještaje u skladu s propisima kojima se uređuje računovodstvo neprofitnih organizacija.
- (2) Udruženje mora učiniti dostupnim javnosti sve informacije koje se tiču rada i djelovanja Udruženja, a u skladu s propisima na snazi.

Član 41.

- (1) Sredstva Udruženja mogu se koristiti isključivo za ostvarivanje ciljeva i djelatnosti predviđenih Statutom.

Član 42.

- (1) Upravni odbor Udruženja podnosi godišnji finansijski izvještaj skupštini Udruženja najkasnije do 31. marta tekuće godine za prethodnu kalendarsku godinu, sa podacima o imovini Udruženja, приходима, rashodima i drugim pitanjima od značaja za raspolaganje imovinom i za finansijsko poslovanje udruženja.
- (2) Finansijske izvještaje iz prethodnog stava ovog člana Udruženje je dužno čuvati najmanje pet godina, osim ako posebnim propisom nije utvrđen duži period čuvanja, te ih u zakonskom roku dostavljati Ministarstvu i drugim nadležnim organima.

Član 43.

- (1) Upravni odbor je dužan, najmanje jednom godišnje, podnijeti Skupštini izvještaj sa podacima o imovini Udruženja, приходима, rashodima i drugim pitanjima od značaja za raspolaganje imovinom i za finansijsko poslovanje Udruženja.
- (2) Nadzor nad upotrebom imovine Udruženja vrši Skupština.

Član 44.



- (1) Imovnu Udruženja čine novčana sredstva, stvari i prava koje Udruženje stiče u skladu sa Zakonom i ovim Statutom.
- (2) Za obaveze prema trećim licima, Udruženje odgovara cjelokupnom imovinom.

Član 45.

- (1) Za obavljanje svih stručnih, administrativnih, knjigovodstvenih i drugih poslova, Upravni odbor nalazi mogućnosti i rješenja koja su u skladu sa Zakonom i principima racionalnog poslovanja.
- (2) Radi izvršavanja određenih poslova Udruženje može angažovati odgovarajuća stručna lica, uz naknadu, a u skladu sa zakonom i mogućnostima Udruženja.

X PRIZNANJA I NAGRADE

Član 46.

- (1) Udruženje može donositi odluke o dodijeli priznanja i nagrada Udruženja. Priznanja i nagrade Udruženja može dodjeljivati Skupština, na prijedlog Upravnog odbora.

XI POSTUPAK ZA ZAMJENU I DOPUNU STATUTA I OPĆI AKTI UDRUŽENJA

Član 47.

- (1) Inicijativu za izmjene i dopune Statuta može podnijeti najmanje jedna trećina članova Udruženja i Upravni odbor.
- (2) Inicijativa se podnosi Skupštini pismenim putem i sa odgovarajućim obrazloženjem.
- (3) O izmjenama i dopunama Statuta odlučuje Skupština dvotrećinskom većinom glasova svih članova Skupštine.
- (4) Predsjednik Skupštine potpisuje odluku o izmjenama i dopunama Statuta.

Član 48.

- (1) Pored Statuta, organi Udruženja mogu donositi i druge opće akte i to:
 - (a) odluke,
 - (b) pravilnike,
 - (c) poslovnike i
 - (d) kodekse ponašanja.
- (2) Opći akti Udruženja moraju biti u skladu sa Zakonom i Statutom Udruženja.

Član 49.



- (1) Odluke, kao opći akti, donose se u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opći način uređuje pitanje od značaja za ostvarivanje ciljeva Udruženja.

Član 50.

- (1) Pravilnikom se uređuju odnosi između članova Udruženja, kao i međusobni odnosi organa i Udruženja u ostvarivanju njihovih nadležnosti.

Član 51.

- (1) Poslovníkom se bliže uređuje način rada organa Udruženja.

Član 52.

- (1) Kodeksom ponašanja se propisuju pravila ponašanja članova Udruženja prema trećim licima, nadležnosti organa Udruženja u vezi sa primjenom kodeksa, pravila postupka pred nadležnim organima Udruženja u slučaju kršenja kodeksa, kazne za kršenje odredbi kodeksa i druga pitanja od značaja za njegovu primjenu.

Član 53.

- (1) Originalni primjerci općih akata Udruženja čuvaju se u arhivi Udruženja.

XII ZASTUPANJE UDRUŽENJA

Član 54.

- (1) Udruženje u pravnom prometu zastupa Direktor u okviru svojih ovlaštenja utvrđenih Zakonom i Statutom.

Član 55.

- (1) U postupcima u kojima Udruženje učestvuje kao stranka radi ostvarivanja svojih prava, dužnosti i odgovornosti pred nadležnim organima, Direktor može dati advokatu ili drugom stručnom licu pismenu punomoć za zastupanje Udruženja.

XIII STATUSNE PROMJENE I PRESTANAK RADA UDRUŽENJA, POSTUPAK ZA RASPOLAGANJE PREOSTALOM IMOVINOM ILI DRUGIM SREDSTVIMA UDRUŽENJA U SLUČAJU RASPUŠTANJE ILI PRESTANAK RADA UDRUŽENJA

Član 56.

- (1) Udruženje se može spojiti ili podijeliti u drugo udruženje.



- (2) Spajanje je osnivanje novog udruženja na koji prelazi cjelokupna imovina tri ili više udruženja koja se spajaju. Spajanjem, udruženja prestaju da postoje, a na postupak upisa novonastalog udruženja primjenjuju se odredbe ovog zakona koji se odnosi na osnivanje udruženja.
- (3) Udruženje se može podijeliti na dva ili više udruženja. Podijeljeno udruženje prestaje da postoji, a na Postupak upisa novonastalih udruženja primjenjuju se odredbe ovog zakona koji se odnosi na osnivanje udruženja.
- (4) Udruženje može osnovati svoje kancelarije, predstavništva i podružnice u skladu sa odredbama statuta Odlukom o statusnim promjenama iz prethodnih stavova donosi Skupština dvotrećinskom većinom svih članova Skupštine.

Član 57.

- (1) Udruženje na osnovu odluka Skupštine Udruženja može osnovati druga pravna lica u skladu sa odredbama Zakona i ovog Statuta, i sticati udjele i dionice u privrednim društvima u skladu sa Zakonom.

Član 58.

- (1) Nad imovinom Udruženja može se provesti stečaj.
- (2) Stečajni postupak provodi nadležan sud na čijem je području sjedište Udruženja, a u skladu s zakonom kojim je reguliran stečaj pravnih lica.

Član 59.

- (1) Udruženje prestaje sa radom dobrovoljno ili po sili Zakona.
- (2) Smatra se da je Udruženje prestalo djelovati kada:
 - (a) je proteklo dvostruko više vremena od vremena utvrđenog Statutom za održavanje skupštine Udruženja, a skupština nije održana;
 - (b) se broj članova Udruženja smanji ispod broja tri, a nadležni organ udruženja u roku od tri mjeseca od nastupanja ove okolnosti ne donese odluku o prijemu novih članova Udruženja;
 - (c) u drugim slučajevima utvrđenim Zakonom ili ovim Statutom.
- (3) U skladu sa Zakonom lica ovlaštena za zastupanje Udruženja su dužna da u roku od 30 dana od dana kada je Udruženje prestalo djelovati u skladu sa stavom 2. ovog člana dostaviti nadležnom organu zahtjev za brisanje udruženja s dokazima o prestanku rada Udruženja.
- (4) Udruženje prestaje sa radom po sili Zakona, u skladu sa odredbama članova 51. i 52. Zakona o udruženjima i fondacijama Bosne i Hercegovine.

Član 60.

- (1) Udruženje je dužno svaku statusnu promjenu prijaviti nadležnom Ministarstvu u roku utvrđenim Zakonom.



XIV RASPOLAGANJE PREOSTALOM IMOVINOM

Član 61.

- (1) U slučaju donošenja odluke o prestanku rada Udruženja, Skupština donosi plan likvidacije, kojim se utvrđuje raspored imovine, prava i obaveza Udruženja. Skupština imenuje likvidatora Udruženja, čija je dužnost da sastavi plan likvidacije imovine Udruženja i isti podnosi Skupštini na usvajanje.
- (2) Nakon raspuštanja i prestanka s radom i izmirenja obaveza Udruženja, preostala imovina i sredstva Udruženja dodijeliti će se drugom registriranom udruženju koje ima iste ili slične ciljeve i djelatnosti, koje je imalo Udruženje, a na osnovu odluke Skupštine, iz stava (1) ovog člana.

XV PRELAZNE I ZAVRŠNE ODREDBE

Član 62.

- (1) Autentično tumačenje ovog Statuta vrši Skupština.

Član 63.

- (1) Ovaj Statut stupa na snagu danom njegovog donošenja.
- (2) Danom stupanja na snagu ovog Statuta prestaje da važi i primjenjuje se Statut Udruženja inovativnih proizvođača lijekova u Bosni i Hercegovini broj: 3/13 od 23.12.2013. godine uključujući i sve njegove izmjene i dopune.

Broj: 6/23

U Sarajevu, dana 30.03.2023. godine.

Predsjednik Skupštine Udruženja

Alida Đulančić